



## The Holy See

---

IOANNES PAULUS EPISCOPUS

SERVUS SERVORUM DEI

AD PERPETUAM REI MEMORIAM CONSTITUTIO APOSTOLICA **SUIDNICIENSIS** \* IN POLONIA NOVA

CONDITUR DIOECESIS SUIDNICIENSIS. Multos fructus spiritalis exoptantes inter populum Silesiae orituros, libenter sane accepimus postulationem quam Nobis praesentaverunt Venerabilis Frater Noster Henricus Romanus S.R.E.

Cardinalis Gulbinowicz, sacrorum Antistes Vratislaviensis, et Venerabilis Frater Thaddaeus Rybak, Episcopus

Legnicensis, audita sententia Conferentiae Episcoporum Poloniae, ut ex quadam parte ecclesiasticarum iis commissis circumscriptionum nova dioecesis erigeretur. Quamobrem, favente voto Venerabilis Fratris Iosephi Kowalczyk,

Archiepiscopi titulo Heracleensis et in Polonia Apostolici Nuntii, de consilio Secretariae Status, Nos Apostolica Nostra usi potestate quae sequuntur decernimus: ab archidioecesi Vratislaviensi seiungimus decanatus: *Bystrzyca*

*Kłodzka, Dzierżoniów Południe, Dzierżoniów Północ, Kamieniec Żąbkowicki, Kłodzko, Kudowa Zdrój, Łądek Zdrój, Międzyzlesie, Nowa Ruda, Polanica Zdrój, Świdnica Śląska Wschód, Świdnica Śląska Zachód, Żąbkowice Śląskie;* a dioecesi Legnicensi separamus decanatus: *Bolków,*

*Głuszyce, Gościsław, Jawor* (sed cum sola paroecia *Gniewków*), *Strzegom, Świebodzice, Wałbrzych Południe, Wałbrzych Północ, Wałbrzych Zachód,* atque ex ita distracto territorio

novam dioecesim constituimus *Suidnicensem* nuncupandam. Huius novae ditionis sedem in oppido v.d.

*Świdnica* constituimus ecclesiamque paroecialem inibi sitam, Deo dicatam in honorem S. Stanislai, Episcopi et Martyris, et S. Venceslai, Martyris, ad gradum dignitatemque Ecclesiae Cathedralis evehimus. Novam praeterea hanc

dioecesanam communitatem suffraganeam constituimus Ecclesiae metropolitanae Vratislaviensi eiusque Episcopum

subdimus metropolitico iuri Archiepiscopi illius Sedis. Simul ac dioecesis Suidniciensis erectio ad effectum deducta fuerit, eo ipso sacerdotes Ecclesiae illi adscripti censeantur in cuius territorio ecclesiasticum officium detinent; ceteri vero clerici

Seminarii tirones Ecclesiae illi incardinati maneant vel incardinentur in cuius territorio legitimum habent domicilium.

Documenta et acta quae conditam hanc dioecesim eiusque clericos, fideles et bona temporalia respiciunt, ad eandem Curiam mittantur ibique in tabulario serventur. Quod vero ad Consilia in dioecesi instituenda attinet necnon Curiam

episcopalem et Seminarium, sacerdotum formationem, bonorum ecclesiasticorum administrationem, sede vacante

administratoris electionem, fidelium iura horumque similia, serventur quae sacri canonis praescribunt. Ad Seminarium

alumnorum institutionem quod respicit, iuris communis serventur praescripta, prae oculis habitis Congregationis pro

Institutione Catholica praeceptis. Cum fas erit, selecti alumni vel sacerdotes ad studia complenda Romam mittantur. Haec

autem ad singula Nostra mandata exsequenda superius commemoratum Venerabilem Fratrem Iosephum Kowalczyk

destinamus, universas necessarias et opportunas ei tribuentes facultates, etiam subdelegandi ad effectum de quo agitur

quemlibet ministrum in ecclesiastica dignitate iam constitutum, onere iniuncto quam primum ad Congregationem pro

Episcopis authenticum exemplum actus eiusdem peractae executionis remittendi. Hanc denique Constitutionem

Nostram tam nunc quam in posterum ratam esse iubemus, contrariis quibuslibet causis haudquaquam obsistentibus. *Datum Romae, apud Sanctum Petrum, die vicesimo quarto mensis Februarii, anno Domini bismillesimo quarto, Pontificatus Nostri vicesimo sexto.*

ANGELUS card. SODANO <i>Secretarius Status</i>	IOANNES card. RE <i>Congr. pro Episcopis Praef.</i>
---	--

Leonardus Erriquenz, *Protonot. Apost.*

Brennus Chestle, *Protonot.*

*Apost.*

\*A.A.S., vol. XCVI (2004), n.7, pp. 388-390 © Copyright 2004 - Libreria Editrice Vaticana